

مونودراما يوم فى حياة مدرس (إجتماعية , نقدية)

تأليف

محمد أبراهيم

(جرس المنبه يدق , يستيقظ الأستاذ حمدى . يمد يده ويلتقط المنبه من جواره وينظر فيه)

- لسه بدري

(يعود للنوم مرة أخرى ثم يقوم منتفضا على صوت زوجته توقظه)

- خضيتينى يا شيخه . هى الساعة كام دلوقت , إيه سبعة إلا ربع يانهار أسود . سبتينى ليه كل ده , ده أنا عندى إشراف عام النهارده . ولسه حأتوضا وأصلى . والعربية بتتصلح ولسه لما ألقى مشروع والا تاكس , منك لله , إيه بتقولى إيه أخده عارضه , لا كله إلا ده ماينفعش , آه حقى لكن الأستاذ عبده مبيقبلش عارضه من اللى مكلف بإشراف أو يوم عمل , إيه عاوزه كام ؟ ليه ؟ هو أنا ماهيتى بعد الكادر بإذن الله قد إيه ؟ وأهو على إيدك قاعد جنبك كل يوم خلاص مفيش طلبة بندخل علمى كلهم أدبى , أنا واقف بارغى معاكى و أنا متأخر . السلام عليكم .

(ينزل حمدى إلى الشارع ويحاول أن يجد مواصلة للذهاب إلى العمل)

- محطة مصر . تاكسى , المحطة , المحطة , تاكس , المجطة , كويس فيه مكان فى المشروع ده الحمد لله , حاسب ياعم بتزق ليه على الصبح , أنا جيت جنبك ياست , خدنى جنبك يا أخ ربنا يكرمك , أنت يا أستاذ أنت يا أخ أنت ياللى بتدخن خلاص يعنى , لأ ما أنتش حر , طفى السجارة لو سمحت , والنبي يأسطى شغل شريط قرآن واللاحاجة تانية غير الشريط ده اللى إنت مصدعنا بيه , ده مين ده اللى بيغنى ده إسمه إيه ؟ ده مبيض نحاس واللا إيه ؟

(يدخل حمدى المدرسة مسرعا)

- صباح الخير يا أستاذ ممدوح , صباح الخير يا أحمد ياصلاح إيه فيه متابعة ! على الصبح كده ! هو كل يوم , الله هم الجماعة دول مافيش وراهم حد غيرنا , ما يروحوا ياأخى المدراس اللى جنبنا اللى مفيش فيها طالب من أول السنة , الإمضاء جوه عند الرئيس ماشى , ربنا يستر .
- صباح الخير يا ريس , لا والله يا ريس , الناموسيه لونها لا كحلى ولا بمبى حتى . ده أنا ما عرفتش أنام من ضرسى طول الليل , شكرا ياريس .

(يتجه حمدى إلى حجرة القسم)

- صباح الخير يا حاج مرجان , صباح الفل يا محمد يا عمر , إزيك النهارده باجروانى , أهلا ياأبو على , القهوه ياشيخو .

(يأخذ حمدى أوراقه ويتجه الى الفصل ويحيى بعض الزملاء فى طريقه)

- صباح الخير إزيك بأستاذ ميشيل , إجتماع مجلس إدارة ؟ ماشى , صباح الخير يا أستاذ عادل إجتماع جماعة التطوير فى المكتبة ؟ حاضر , على فكره أنا عملت عرض باور بوينت للطلبة , ياريت تجيب الأستاذ عبده والأستاذ السيد منصور الحصه دى .

- صباح الفل ياأستاذ عيسوى ماشى حاجى القهوه أشرب معاك حجر معسل , صباح الخير يا سمير يا شوقى إيه أخبارك متزعلش منى أنا وعرفة وشمس عشان غلبناك فى الطاولة , خلى حسين الزيات ينفعك , جوهرى إيه ياسيدى أخبار ال 50% بتاعت الكادر؟ لسه شويه , ربنا موجود , أستاذ محفوظ فين يا عم كارنيهات النقابة الجديدة , برضه لسه شويه , إيه الحكاية أنتو متفقين مع بعض والا إيه !

(يدخل حمدى الفصل)

- السلام عليكم يا اولاد , شكرا اتفضلوا اقعو , النهارده 10 يناير 2008 عنوان الدرس حساب عمر الصخر , أحسن تيجى المتابعة تلاقينى بأشرح الدرس وناسى التاريخ والعنوان تبقى مشكلة , مش عارف الشكليات والروتين ده ماله متأصل عندنا , على فكره يا أخوانا فيه متابعة فى المدرسة وعاوزين شكلنا يكون كويس , كل واحد يطلع كشكول الحصه عشان أفوت أصحابها بسرعة , إيه يابنى دى كراسة دى ؟ دى كام صقحة ؟ عشرين صقحة , لأ دى ماتنفعش إبتدائى حتى , وفين الغلاف بتاعها , الله يخرب بيتك , إيه اللى

كاتبه عليها متبصليش بعين رضيه !! هو أنت سواق تاكس واللى بتبيع كشرى , وأنت يا زفت ماجتش
الدرس امبارح ليه أختك ولدت , مبروك ياسيدى ماتتساش الحمص , وفلوس الدرس عليك شهرين لأ
ياحبيبي تدفع الحصة اللي جاية , وأنت يا زفت مش قلت حتيجي الدرس معاك اتنين صحابك , أيوه اللي
عند المدرس اياه , علوز ايه تروح الحمام هو إحنا فى ابتدائي مش عارف تمسك نفسك , أنزل , ألو أيوه
لأ معقول , الوليه إتجننت والا إيه , ده ليس تلبسه واحده فى سنه ومركزها , لأ وبتصلى ورجليها عريانه
! بقولك إيه أنا فى الحصة دلوقت لما أخلصها حأكلمك , ايه الجرس ضرب , طيب يا أولاد نشرح الدرس
الحصة اللي جايه .

(يخرج حمدى من الفصل ويتجه إلى حجرة أخرى)

- صباح الخير ياأستاذة فدوى أه لحقت التوقيع الحمد لله , إزيك ياسبد يا خريطه أنا مش عارف با أخى أنت بتيجي
بدرى قوى إزاي أوعى تكون بتبات هنا , إزيك ياأستاذة سامية إيه النيو لوك ده ؟ ده ياستى دفتر التحضير
وده درس النهارده وده سجل الإشراف , شكرا , حاضر يا أستاذة سعاد حأكتب تدريب شهر يناير , أيوه
ياأستاذة ناديه دفاقر المكتب ؟ حاضر , أزيك يا أستاذة زينب , أه النهارده حنعمل بروفة بس يارب يكون
خالد موجود النهارده , اية غايب ؟ بقى عنده 27 يوم عارضه , ماله خالد ده ؟ الشئون القانونية كلها
معندهاش شغل اللي هو , الأستاذ عبده قال له أنت تروح الشئون القانونية وقول لهم أنا خالد عثمان
حيعملوا عليك طابور ولا طابور العيش , أنا إتأخرت عن الإجتماع .

(يتجه إلى مكان آخر)

- السلام عليكم أيوه يا عادل يا لبيب أنا جهزت ملف المتعلم وعملت قاعدة بيانات للطالب , والله مش عارف يا
إبراهيم ياشمس إيه الحكاية إحناالعرب كنا بتوع كلام وبقينا دلوقت ظاهرة كلامية وورقية , على رأيك
أيام الوزير إياه كان لازم كل مدرسة تكتب على جدرانها مدرستى جميلة ونظيفة ومتطورة وضافو لها
ومنتجة مش عارف بتنتج إيه بالظبط ؟ وعمل كمان الكتلة الحرجة , وفجأة لقينا التطوير وحجم الفجوة
وإتساع الفجوة وفجأة كل ده إتلقى وجت الجودة , لأ وشوف الإبداع مجلس الآباء ينقلب إلى مجلس
الأمناء , ده فكر واضح وراه أمريكا , وهى أمريكا ييجي من وراها خير , مش أمريكا اللي بتدور على
حقوق الشواذ , وبتصدر لنا العرى فى الفضائيات , وإيه أخبار الكادر ؟ لازم إمتحان تربوى ولغة عربية
ومادة التخصص ! بعد ماشاب ودوه الكتاب , ده إحنا بقينا عضمة كبيرة وعندنا زهير , دول المفروض
يلمونا وبدل مايودونا الأكاديمية يودونا دار المسنين , على رأيك بلاش نتكلم فى الكادر والجودة , الكلام
ده يجيب المرض . نضحك أحسن ما نعيه ؟ نضحك , نضحك , نضحك على إيه ؟ مش لاقين حاجه تخلى
الضحكه تطلع من القلب مجلجله زى زمان لما كنا نضحك لحد ما عنينا تدمع وجبنا يوجعنا من الضحك ,
فيه إيه فى اليلد يضحك ؟ على رأيك ده كل أحوال البلد تضحك , أيوه بس ضحك مر , كل حاجه فى البلد
أنقلبت موازينها وإختلت , ياراجل ده حتى مش عارفين نرصف طريق , ده الكورنيش بعد ما إتسفلت عند
المحروسة لقوه على عن نص الطريق التانى , ولا الخصخصة و المصانع اللي إتباعت , ولا سعر الحديد
والأسمنت اللي خلى سعر الشقق يولع , بنتك وإبنى وإبنك حيتجوزوا إزاي ؟ ولا الشباب طاقة مصر
ومستقبلها المعطلة , اللي مترصصين فى المولات والقهاوى والسيبرات , ولا أسعار المواد الغذائية اللي
بتزيد كذا مره فى اليوم ! تخيل إن الحشيش هو الحاجه الوحيد اللي رخصت , ولا الطوابير اللي
المصرى بيقتضى فيها نص عمره , من طابور البطاقة الجديده لطابور إضافة المواليد لبطاقة التأمين ,
والروتين والموظفين اللي بيتفننوا فى تعذيب الناس , ولا المصيبة الجديده طابور العيش ! شوف الكارثة
ده المفروض إن مصر دولة زراعية وصناعية بإمارة إيه ؟ المصانع اللي اتباعت وإتهدت وعملوا مكانها
أبراج سكنيه ومولات , والا المنتجات الزراعية اللي فيها مبيدات مسرطنه , ولا القمح اللي مش مكفينا
ناكل , وبتقول اضحك ! إزاي يا شمس , برضه اضحك , اضحك أحسن أموت , حاضر حأضحك أه ,
أدينى بأضحك , أنا بأضحك أه أه , و أنتو كمان أضحكوا أضحكوا كمان , أضحكوا كمان وكمان ,
أضحكوا على نفسكو , أضحكوا أكثر أضحكوا أعلى أضحكوا أضحكوا قبل الضحك ما يغلى
أضحكو

(يضحك بشكل هستيرى وينقلب إلى البكاء)

النهاية